



Bentiaraq Ottosen

UPA 2026/173-1

Atassut

27. Maj 2026

**Inuiaqatigiit nunatsinni tarnikkut peqqinnerulernissaannik siunertaqarluni periusissiamik UPA2027-mut Naalakkersuisut suliaqaqqullugit peqquneqarnissaanik Inatsisartut aalajangiiffissaattut siunnersuut. Periusissiaq UPA2027-mi saqqummiunneqassaaq.**

(Inatsisartunut ilaasortaq, Nivi Rosing, Inuit Ataqtigiit)

Atassutip politikikkut tapersersortuaanarpaa inuit tarnimikkut timimikkullu peqqissuunissaat pitsaasumik sinaakkusersorneqarnissaat, tamanna pingaartuuvoq inuup nammineq naleqassuseqarluni misigisimanissaa, inuiaqatigiinni peqataasinnaanera aammalu ilaqtariinni toqqissimasumik inuuneqarnissaa. Atassutip politikia naapertorlugu ilaqtariinermut politikki sukarsuit annersaaraat. Taamaattumik Atassut isumaqarpoq politikikkut aaliangiinerit innuttaasunut qaninnerusariaqartut, qulakkeerumallugu nuna tamakkerlugu innuttaasut assigiingitsumik atugaqarnerat eqqarsaatigalugit. Atassutip politikimini Inuk qitiutillugu pingaartitaraa, kiffartuusineq inuiaqatigiinni toqqissisimanermik inuppalaartumillu kinguneqartikkumallugu, inuk inatsisitigut illersorsinnaaqqullugu.

Siunnersuuteqartoq pisariaqartumik saqqummiussaqaarpoq, tamanna periusissiap ersarinnerusumik inuiaqatigiinni kinguneqartinneqarnissaa oqariartuutigaa, periusissiaq pillugu siunnersuummi Atassutip pingaartippaa pinaveersaartitsineq siullunneqassasoq. Meeqqat inuusuttullu pitsaasumik toqqissimasumillu peroriartornissaat inuiaqatigiinnut aningaasaliineruvoq pingaarutilik. Taamaattumik atuarfiit, ulluunerani paaqqinnittarfiit kiisalu ilaqtariit akornanni suleqatigiinneq nukittorsarneqassaaq. Angajoqqaat akisussaaffiat tapersersorneqassaaq, meeqqanullu pitsaasumik sinaakkuteqartitsineq inuiaqatigiinni tunngaviusutut isigineqassaaq.

Atassut aamma isumaqarpoq tarnikkut ajornartorsiutit pillugit oqaloqatigiinneq ammanerulertariaqartoq. Inuit amerlanerit nipangiinnarlutik unammilligassanik nammattarput, taamaattumillu inuiaqatigiinni ataqeqatigiinneq paasinninnerlu annertusarneqarnissaat pingaaruteqarpoq. Inuit tarnikkut artorsartunik naapitsisut piaarnerpaamik ikiorneqarsinnaanissaat qulakkeerneqassaaq, najukkami qanigisaminnit aammalu pisortanit tapersersorneqarlutik.

Nunatsinni immikkut unammilligassat soorlu ungasissutsit, inoqarfiit minnerusut aammalu sulisussarsiornermi ajornartorsiutit eqqarsaatigalugit Atassut isumaqarpoq aaqqiissutit nunatsinni pissutsinut naleqqussagaasariaqartut. Nunaqarfinni innuttaasunut periarfissat



pitsaanerulersinneqarnissaat pingaaruteqarpoq, taamaalillutik illoqarfinni innuttaasunut naligiinnerusumik ikiorserneqarsinnaaniassammata.

Atassutip pingaartippaa nammineq piumassutsimik suliallit, timersoqatigiiffiit, kulturikkut peqatigiiffiit kiisalu upperisarsiornikkut suleqatigiiffiit inuiaqatigiinni pingaarutilimmik inissisimanerat. Ataatsimoorneq innuttaasullu akornanni attaveqatigiinneq tarnikkut peqqinnermut iluaqutaasarpoq, taamaattumillu suliniutit taamaattut tapersersorneqartariaqarput.

Atassutip siunnersuut taperserpaa, kisianni pingaaruteqartoq tassaavoq innuttaasut peqataatinneqarnissaat aammalu periusissiap oqaatsit kisimik pinnagit piviusunngortinneqarnissaa. Atassut isumaqarpoq inuiaqatigiinni ataasiakkaat periarfissillugit akisussaaffeqartitsillugillu, kiisalu ilaqtariit inuiaqatigiillu nukittorsarlugit nunatsinni tarnikkut peqqinnerulernissaq anguneqarsinnaasoq.

Taama oqaaseqarluta siunnersuut taperserparput, ilaqtariinnermut peqqissutsimullu ataatsimiititaliamut innersuullugu.